

REGLUGERÐ FRAMKVÆMDASTJÓRNARINNAR (ESB) 2019/335

2020/EES/5/45

frá 27. febrúar 2019

um breytingu á III. viðauka við reglugerð Evrópuþingsins og ráðsins (EB) nr. 110/2008 að því er varðar að skrá brennda drykkinn „Tequila“ sem landfræðilega merkingu (*)

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af reglugerð Evrópuþingsins og ráðsins (EB) nr. 110/2008 frá 15. janúar 2008 um skilgreiningu, lýsingu, kynningu, merkingu og vernd landfræðilegra merkinga á brenndum drykkjum og niðurfellingu á reglugerð ráðsins (EBE) nr. 1576/89 ⁽¹⁾, einkum 8. mgr. 17. gr.,

og að teknu tilliti til eftirfarandi:

- 1) Mexíkóskur aðili, stofnaður samkvæmt mexíkóskum lögum, Consejo Regulador del Tequila (hér á eftir nefndur umsækjandinn), sótti um að „Tequila“ yrði skráð sem landfræðileg merking í III. viðauka við reglugerð (EB) nr. 110/2008 í samræmi við málsmeðferðina sem kveðið er á um í 1. mgr. 17. gr. þeirrar reglugerðar. „Tequila“ er brenndur drykkur sem hefð er fyrir að sé framleiddur í Mexíkóska ríkjasambandinu með því að eima safu sem er fenginn úr *Agave tequilana* F.A.C. Weber (blátt yrki).
- 2) Í samræmi við 5. mgr. 17. gr. reglugerðar (EB) nr. 110/2008 tók framkvæmdastjórnin til athugunar umsókn um að skrá heitið „Tequila“ sem umsækjandinn sendi inn.
- 3) Þar eð framkvæmdastjórnin komst að þeirri niðurstöðu að umsóknin væri í samræmi við reglugerð (EB) nr. 110/2008, birti hún meginskilgreininguna í tækniskjalinu fyrir „Tequila“ í *Stjórnartíðindum Evrópusambandsins* ⁽²⁾ skv. 6. mgr. 17. gr. reglugerðar (EB) nr. 110/2008 í tengslum við andmælaferlið.
- 4) Í samræmi við 7. mgr. 17. gr. reglugerðar (EB) nr. 110/2008 og 1. mgr. 13. gr. framkvæmdarreglugerðar framkvæmdastjórnarinnar (ESB) nr. 716/2013 ⁽³⁾ lögðu *Unión Española del Licor* frá Spáni og *Vinum et Spiritus* frá Belgíu fram andmæli, innan tilgreindra tímamarka, gegn því að heitið „Tequila“ yrði skráð sem landfræðileg merking. Framkvæmdastjórnin taldi þessi tvennu andmæli tæk skv. 14. gr. framkvæmdarreglugerðar (ESB) nr. 716/2013. Andmæli bárust einnig frá *Unión de Licoristas Cataluña*, sem og frekari upplýsingar frá *Unión Española del Licor* og frá *Vinum et Spiritus*, en þau töldust ekki vera tæk í samræmi við 1. mgr. 14. gr. framkvæmdarreglugerðar (ESB) nr. 716/2013 þar eð þau voru ekki lögð fram innan þeirra tímamarka sem um getur í 7. mgr. 17. gr. reglugerðar (EB) nr. 110/2008.
- 5) Með bréfi dagsettu 4. apríl 2017 tilkynnti framkvæmdastjórnin umsækjandanum um þessi tvennu tæku andmæli og gaf honum kost á að leggja fram athugasemdir innan tveggja mánaða í samræmi við 1. mgr. 15. gr. framkvæmdarreglugerðar (ESB) nr. 716/2013. Umsækjandinn sendi athugasemdir sínar 3. júní 2017, innan tilskilins frests.
- 6) Í samræmi við 1. mgr. 15. gr. framkvæmdarreglugerðar (ESB) nr. 716/2013 tilkynnti framkvæmdastjórnin andmælandunum tveim um athugasemdir umsækjandans með bréfi frá 31. júlí 2017 og fengu þeir tvo mánuði til að leggja fram athugasemdir í samræmi við 2. mgr. 15. gr. þeirrar framkvæmdarreglugerðar. Framkvæmdastjórninni barst svar frá *Unión Española del Licor* 22. september 2017.
- 7) Andmæli *Unión Española del Licor* og *Vinum et Spiritus* tengjast lögboðnum kröfum sem mælt er fyrir um í opinbera staðlinum NOM-006-SCFI-2012 (áfengir drykkir — Tequila — nákvæm skilgreining) sem birtur var í Diario Oficial de la Federación 13. desember 2012 ⁽⁴⁾ (hér á eftir nefndur opinberi mexíkóski staðallinn) og vísað er til hans í tækniskjalinu fyrir „Tequila“, varðandi: a) kröfur um merkingar vegna markaðssetningar og heilsufarsupplýsinga og vegna tilvísunarnúmera heimilaðra framleiðenda; b) takmarkanir á viðskiptafyrirkomulagi milli birgja og átappara að því er varðar heimild til að nota skráð vörumerki eða önnur einkennandi merki og takmarka þannig möguleika átappara til að kaupa inn

(*) Þessi ESB-gerð birtist í Stj. 2019, ESB L 60, 28.2.2019, bls. 3. Hennar var getið í ákvörðun sameiginlegu EES-nefndarinnar nr. 299/2019 frá 13. desember 2019 um breytingu á II. viðauka (Tæknilegar reglugerðir, staðlar, prófanir og vottun) við EES-samninginn (bíður birtingar).

(1) Stj. 2008, ESB L 39, 13.2.2008, bls. 16.

(2) Stj. 2016, ESB C 255, 14.7.2016, bls. 5.

(3) Framkvæmdarreglugerð framkvæmdastjórnarinnar (ESB) nr. 716/2013 frá 25. júlí 2013 um reglur vegna beitingar reglugerðar Evrópuþingsins og ráðsins (EB) nr. 110/2008 um skilgreiningu, lýsingu, kynningu, merkingu og vernd landfræðilegra merkinga á brenndum drykkjum (Stj. 2013, ESB L 201, 26.7.2013, bls. 21).

(4) NORMA Oficial Mexicana NOM-006-SCFI-2012, Bebidas alcohólicas — Tequila — Especificaciones birt í Diario Oficial í Mexíkó 13. desember 2012.

mexíkóskar vorur og takmarka markaðssetningu „Tequila“ eftir átöppun við tiltekin heimiluð vörumerki og koma þannig í veg fyrir markaðssetningu undir eigin vörumerkjum rekstraraðila án sérstakrar heimildar; c) reglur um heimildir rekstraraðila í Sambandinu sem hafa heimild til að átappa „Tequila“ og forskriftir fyrir átöppunaraðferðir; d) kröfur um eftirlit sem gilda um átappara sem hafa heimild á yferráðasvæði Sambandsins sem og afleiðingarnar sem mælt er fyrir um í opinbera mexíkóska staðlinum ef ekki er farið að tilskildum ákvæðum; e) bann við verslun með vöruflokkinn blandað „Tequila“ í lausu (sem inniheldur allt að 49% af afoxandi sykrum af öðrum uppruna en úr sykrum úr bláu yrki *Agave tequilana* F.A.C. Weber) innan Sambandsins og bann við innkaupum á flokknum blandað „Tequila“ í lausu fyrir milligöngu þriðju lands og f) krafa um að „Tequila“ í flokknum 100% agave verði að fara í átöppun í verksmiðju sem heimilaðir framleiðendur, sem staðsettir eru á tilteknu landsvæði í Mexíkóska ríkjasambandinu, stjórna. Andmælendur fullyrða að þessar kröfur fari í kringum og séu ósamrýmanlegar við fríverslun og fjálsa samkeppni með „Tequila“ í aðildarríkjunum og brjóti sérstaklega í bága við 6. gr. reglugerðar (EB) nr. 110/2008.

- 8) Umsækjandinn heldur því fram að vísa ætti andmælunum frá sem ótækum vegna þess að andmælendur notuðu ekki sniðmátið, sem krafist er í 1. mgr. 13. gr. framkvæmdarreglugerðar (ESB) nr. 716/2013, við framlagningu sína og að andmælendurnir hafi ekki sýnt fram á hvaða tilteknu skilyrði fyrir skráningu, sem kveðið er á um í reglugerð (EB) nr. 110/2008, séu ekki uppfyllt. Umsækjandinn heldur því fram að meginmarkmið eftirlitskerfisins fyrir átöppun, markaðssetningu og dreifingu sé að tryggja rekjanleika og þar af leiðandi ósvikni „Tequila“. Auk þess heldur umsækjandinn því fram að hvaða rekstraraðili sem er, sem vill tappa „Tequila“ í lausu á flöskur, geti gert það svo fremi að hann fái samþykkisvottorð Tequila-átappara og geri samning um sameiginlega ábyrgð um skráða vörumerkið eða önnur einkennandi merki.
- 9) Enn fremur lítur umsækjandinn svo á að engar þeirra athugasemda sem draga í efa beitingu opinbera mexíkóska staðalsins gefi ástæðu til andmæla í samræmi við reglugerð (EB) nr. 110/2008 þar eð heitið „Tequila“ sé þegar bindandi samkvæmt ákvæðum samningsins á milli Sambandsins og Mexíkóska ríkjasambandsins frá 27. maí 1997 um gagnkvæma viðurkenningu og verndun á auðkenningu brenndra drykkja (hér eftir nefndur samningurinn frá 1997) ⁽⁵⁾ þar sem mælt er fyrir um í 2. mgr. 4. gr. að á yferráðasvæði Sambandsins megi ekki nota verndaða heitið „Tequila“ nema að uppfylltum þeim skilyrðum sem mælt er fyrir um í lögum og reglugerðum Mexíkóska ríkjasambandsins.
- 10) Að því er varðar snið andmælanna sem umsækjandinn nefndi taldi framkvæmdastjórnin andmælin frá *Unión Española del Licor and Vinum et Spiritus* tæk þar eð þau uppfylla kröfurnar sem mælt er fyrir um í 1. mgr. 13. gr. og 1. mgr. 14. gr. framkvæmdarreglugerðar (ESB) nr. 716/2013 því allar upplýsingar, sem krafist er á eyðublaðinu „Beiðni um andmæli gegn landfræðilegri merkingu“ sem sett er fram í III. viðauka við þá framkvæmdarreglugerð, voru veittar í andmælunum.
- 11) Að því er varðar gildissvið reglnanna í opinbera mexíkóska staðlinum lítur framkvæmdastjórnin svo á að þar eð hann er reglugerð þriðja lands hafi þær ekki bein áhrif utan svæðisbundins gildissviðs í Sambandinu. Með birtingu meginmarkmiðgreiningarinnar í tækniskjalinu fyrir „Tequila“ í *Stjórnartíðindum Evrópusambandsins* eru þó tilteknar reglur úr opinbera mexíkóska staðlinum sérstaklega nefndar og þess vegna er fullyrt að þær gildi um vöru sem ætluð er til útflutnings. Þær ná yfir framleiðslukröfur, ákvæði um merkingar og reglur um átöppun á „Tequila“ í flokknum 100% agave sem eru settar fram eða vísað til í fyrrnefndri birtingu í *Stjórnartíðindunum Evrópusambandsins*. Ekki er hægt að vernda kerfi með reglugerð (EB) nr. 110/2008 sem gerir rekstraraðilum eða yfirvöldum í þriðja landi kleift að hindra dreifingu vöru á innri markaðinum, með aðferðum sem samræmast ekki meginreglum í lögum Sambandsins, eftir að hún hefur verið flutt inn.
- 12) Að því er varðar tengingu við samninginn frá 1997 sem verndar „Tequila“ á yferráðasvæði Sambandsins ber að hafa hugfast að möguleg vernd samkvæmt reglugerð (EB) nr. 110/2008 fylgir öðrum lagareglum sem eru óháðar þeim sem mælt er fyrir um í samningnum frá 1997. Í ljósi þess að umsækjandinn hefur ákveðið að sækja um einstaka vernd á landfræðilegu merkingunni „Tequila“ samkvæmt reglugerð (EB) nr. 110/2008, til viðbótar við verndina samkvæmt samningnum frá 1997, ætti að taka skýrt fram að vernd samkvæmt þessum tveimur gerningum gildir samkvæmt reglum hvors gernings fyrir sig.
- 13) Framkvæmdastjórnin lagði mat á röksemdir og sannanir sem andmælendur og umsækjandinn lögðu fram og komst að þeirri niðurstöðu að skrá ætti heitið „Tequila“ sem landfræðilega merkingu í III. viðauka við reglugerð (EB) nr. 110/2008 á grundvelli eftirfarandi atriða.

⁽⁵⁾ Stjút. ESB L 152, 11.6.1997, bls. 15. Samningurinn frá 1997 var innleiddur með reglugerð framkvæmdastjórnarinnar (EB) nr. 936/2009 (Stjút. ESB L 264, 8.10.2009, bls. 5).

- 14) Að því er varðar kröfur um merkingar, sem um getur í a-lið 7. forsendu, er kveðið á um í 1. mgr. 6. gr. reglugerðar (EB) nr. 110/2008 að aðildarríki megi mæla fyrir um viðbótarreglur um framleiðslu, lýsingu, framsetningu og merkingar sem eru strangari en þær sem kveðið er á um í II. viðauka við þá reglugerð (EB) svo fremi að þær séu samrýmanlegar lögum Sambandsins. Ákvæðum 1. mgr. 6. gr. þeirrar reglugerðar skal beitt, að breyttu breytanda, varðandi reglur sem yfirvöld þriðju landa mæla fyrir um. Í opinbera mexíkóska staðlinum og í 9. lið megin skilgreiningarinnar í tækniskjalinu fyrir „Tequila“ virðist sem Mexíkóska ríkjasambandið kveði á um strangari reglur um merkingar á öllum „Tequila“ vörum til viðbótar við þær sem mælt er fyrir um í reglugerð (EB) nr. 110/2008. Reglurnar sem um er að ræða varða upplýsingar um markaðssetningu og heilbrigði, tilvísunarnúmer og nöfn og heimilisföng sem auðkenna heimilaðan framleiðanda eða átappara. Þessar kröfur eru ekki í ósamræmi við reglur Sambandsins um merkingar, einkum þær sem eru í reglugerð Evrópuþingsins og ráðsins (EB) nr. 1169/2011⁽⁶⁾. Krafan um að rekstraraðilar séu auðkenndir með tilvísunarnúmeri eða heiti og heimilisfangi er réttlætunleg í þágu gagnsæis og rekjanleika og ekki ósanngjörn krafa. Af þessum sökum lítur framkvæmdastjórnin svo á að forsendur andmælanna að því er varðar kröfur um merkingar séu örökstuddar og þeim skuli hafnað.
- 15) Takmarkanir á viðskiptafyrirkomulagi milli birgja og átappara, sem um getur í b-lið 7. forsendu, og reglur um heimildir átappara í Sambandinu og málsmeðferðarreglur um fyrrnefndar heimildir, sem um getur í c-lið 7. forsendu, eru rökstuddar með tilliti til þess að þörf er á því að tryggja rekjanleika og koma í veg fyrir svik. Reglunum er sérstaklega beitt varðandi merkingar á vörum sem ætlaðar eru til útflutnings eins og tekið er fram í annarri málsgrein 9. liðar megin skilgreiningarinnar í tækniskjalinu fyrir „Tequila“, sem birt var í *Stjórnartíðindum Evrópusambandsins*, sem vísar til notkunar á heitinu „Tequila“ og skráðum vörumerkjum eða öðrum einkennandi merkjum samkvæmt samningnum um sameiginlega ábyrgð sem skráður var hjá mexíkósku einkaleyfa- og vörumerkjaskrifstofunni. Framkvæmdastjórnin lítur svo á að þessar reglur og ráðstafanir, að svo miklu leyti sem þær gilda um notkun á heitinu „Tequila“ innan Sambandsins, séu hóflegar og rökstuddar og að forsendur andmælanna séu örökstuddar og þeim skuli hafnað.
- 16) Að því er varðar kröfur um eftirlit, sem gilda um átappara sem hafa heimild á yfirráðasvæði Sambandsins, sem og afleiðingarnar sem mælt er fyrir um í opinbera mexíkóska staðlinum ef um er að ræða að ekki er farið að tilskildum ákvæðum, sem um getur í d-lið 7. forsendu, er í 22. gr. reglugerðar (EB) nr. 110/2008 mælt fyrir um ákvæði um staðfestingu á því að nákvæmu skilgreiningarnar séu virtar áður en vara er sett á markað sem, að því er varðar „Tequila“ til sölu til neytenda, nær yfir átöppunarstarfsemi og þess krafist sérstaklega að opinber yfirvöld í þriðja landi eða einn eða fleiri vottunaraðilar fyrir afurðir skuli tryggja staðfestingu á því að farið sé að tilskildum ákvæðum varðandi vörur sem eru upprunnar í þriðja landi. Framkvæmdastjórnin veitir því athygli að málsmeðferðarreglur um staðfestingu og aðgerðir ef ekki er farið að tilskildum ákvæðum eru rökstuddar með vísan til þess að nauðsynlegt sé að tryggja rekjanleika og koma í veg fyrir íblöndun og svik sem erfitt er að greina að því er varðar slíka vöru. Að svo miklu leyti sem kveðið er á um í opinbera mexíkóska staðlinum að staðfest sé að nákvæmu skilgreiningarnar í tækniskjalinu séu virtar áður en „Tequila“ til sölu til neytenda er sett á markað Sambandsins eru reglurnar í samræmi við 2. mgr. 22. gr. reglugerðar (EB) nr. 110/2008. Af þessum sökum lítur framkvæmdastjórnin svo á að forsendur andmælanna að því er varðar kröfur um eftirlit séu örökstuddar og þeim skuli hafnað.
- 17) Að því er varðar meint bann við viðskiptum með flokkinn blandað „Tequila“ í lausu innan Sambandsins, sem um getur í e-lið 7. forsendu, veitir framkvæmdastjórnin því athygli að í birtingu á megin skilgreiningunni í tækniskjalinu fyrir „Tequila“ í *Stjórnartíðindum Evrópusambandsins* er eingöngu getið um sértæka reglu um bann við viðskiptum í lausu með „Tequila“ í flokknum 100% agave; það er engin tilvísun sem bannar viðskipti með flokkinn blandað „Tequila“ í lausu á innri markaðnum eftir að það hefur verið flutt inn í Sambandið.
- 18) Að því er varðar meint bann við innkaupum á flokknum blandað „Tequila“ í lausu fyrir milligöngu þriðju landa, sem leiði af kröfunni um að gera samning um sameiginlega ábyrgð sem skráður er hjá mexíkósku einkaleyfa- og vörumerkjaskrifstofunni fyrir afhendingu á vörum í lausu og í ljósi þess að nauðsynlegt er að tryggja rekjanleika og koma í veg fyrir svik, telur framkvæmdastjórnin réttlætunlegt að krefjast þess að einungis megi kaupa vörur í lausu utan Sambandsins frá framleiðendum í upprunalandinu. Af þessum sökum lítur framkvæmdastjórnin svo á að forsendur andmælanna, að því er varðar takmarkanir á vörum í lausu, séu örökstuddar og þeim skuli hafnað.

⁽⁶⁾ Reglugerð Evrópuþingsins og ráðsins (ESB) nr. 1169/2011 frá 25. október 2011 um miðlun upplýsinga um matvæli til neytenda, um breytingu á reglugerðum Evrópuþingsins og ráðsins (EB) nr. 1924/2006 og (EB) nr. 1925/2006 og um niðurfellingu á tilskipun framkvæmdastjórnarinnar 87/250/EBE, tilskipun ráðsins 90/496/EBE, tilskipun framkvæmdastjórnarinnar 1999/10/EB, tilskipun Evrópuþingsins og ráðsins 2000/13/EB, tilskipunum framkvæmdastjórnarinnar 2002/67/EB og 2008/5/EB og reglugerð framkvæmdastjórnarinnar (EB) nr. 608/2004 (Stjtið. ESB L 304, 22.11.2011, bls. 18).

- 19) Að því er varðar þau andmæli að krafan um skyldubundna átöppun innan afmarkaðs landfræðilegs svæðis, sem gildir um „Tequila“ í flokknum 100% agave sem um getur í f-lið 7. forsendu, sé ekki í samræmi við lög Sambandsins ætti að taka það fram að í samræmi við 10. gr. framkvæmdarreglugerðar (ESB) nr. 716/2013 skal rökstyðja allar takmarkanir, sem varða átöppun á brenndum drykkjum innan afmarkaðs landfræðilegs svæðis, í tækniskjalinu þar eð þær hafa í för með sér mögulegar takmarkanir á frjálsum vöruflutningum og frelsi til að veita þjónustu á innri markaðinum. Lög Sambandsins gilda ekki um það að ákvarða hvort þriðja land geti takmarkað átöppun innan yfirráðasvæðis síns eða ekki en þau gilda um að koma í veg fyrir takmarkanir á endurátöppun eða átöppun á vöru í lausu innan Sambandsins ef þessar vörur í lausu voru útfluttar frá þriðja landi til Sambandsins. Einungis má leyfa slíkar takmarkanir ef þær eru nauðsynlegar, hóflegar og til þess gerðar að vernda orðstír landfræðilegrar merkingar. ⁽⁷⁾
- 20) Í 7. lið meginiskilgreiningarinnar í tækniskjalinu heldur umsækjandinn því fram að markmiðið með því að takmarka átöppun sé að varðveita æðri skynmatsmargbreytileika sem gæti verið stefnt í hættu með flutningum í lausu þar eð engum öðrum sykrum en þeim sem fengnar eru úr *Agave tequilana* F.A.C. Weber (blátt yrki) er bætt við. Umsækjandinn heldur því einnig fram að önnur ástæða fyrir takmörkunum á átöppun sé að varðveita orðspor „Tequila“ 100% agave sem er í meginatriðum byggt á sérstökum eiginleikum vörunnar og almennt séð á gæðum hennar sem aftur á móti leiðir af þekkingu heimilaðra framleiðenda á hverjum stað og kann að verða stofnað í hættu vegna áhættu á íblöndun og svikum sem erfitt er að greina. Krafan sem um ræðir verður að teljast vera samrýmanleg við lög Sambandsins þrátt fyrir hamlandi áhrif hennar ef sýnt er fram á að hún sé nauðsynleg og hófleg og geti viðhaldið því góða orðspori mexíkóska heitisins „Tequila“ sem óumdeilt er meðal viðskiptavina. Það leiðir af upplýsingunum í tækniskjalinu að takmarkanir á átöppun takmarkist einungis við einn flokk „Tequila“ en skapi ekki hindrun fyrir innflutningi á flokknum blandað „Tequila“ í lausu til Sambandsins (sem inniheldur allt að 49% sykur af öðrum uppruna en úr hráefninu) sem þessi takmörkun gildir ekki um. Gildissvæði takmörkunarinnar er bundið við afmarkað landfræðilegt svæði fyrir „Tequila“ sem nær til fimm ríkja í Mexíkó. Sannanirnar sem umsækjandinn lagði fram sýna að þessi takmörkun er réttlætunleg sem hófleg og viðeigandi ráðstöfun til að viðhalda tryggingu á samsetningu vörunnar og orðspori hennar meðal neytenda. Enn fremur hefur ekki verið bent á neinar aðrar minna takmarkandi ráðstafanir sem náð geta fram fullnægjandi eftirliti. Því er nauðsynlegur rökstuðningur fyrir takmörkun á skyldubundinni átöppun „Tequila“ í flokknum 100% agave samrýmanlegur við 10. gr. framkvæmdarreglugerðar (ESB) nr. 716/2013.
- 21) Af framangreindum ástæðum telur framkvæmdastjórnin að forsendurnar, sem lagðar eru fram í andmælum við skráningu á landfræðilegu merkingunni „Tequila“ í III. viðauka við reglugerð (EB) nr. 110/2008, að því er varðar skyldubundna átöppun innan afmarkaðs landfræðilegs svæðis sem á við um „Tequila“ í flokknum 100% agave, séu örökstuddar og þeim skuli hafnað.
- 22) Í ljósi framangreinds og í samræmi við 8. mgr. 17. gr. reglugerðar (EB) nr. 110/2008 telur framkvæmdastjórnin að umsóknin um að „Tequila“ verði skráð sem landfræðileg merking uppfylli skilyrðin sem mælt er fyrir um í þeirri reglugerð. Því ætti að vernda heitið „Tequila“ og skrá það sem landfræðilega merkingu í III. viðauka við reglugerð (EB) nr. 110/2008.
- 23) Því ætti að breyta reglugerð (EB) nr. 110/2008 til samræmis við það.
- 24) Ráðstafanirnar, sem kveðið er á um í þessari reglugerð, eru í samræmi við álit nefndarinnar um brennda drykki.

SAMÞYKKT REGLUGERÐ ÞESSA:

1. gr.

Í III. viðauka við reglugerð (EB) nr. 110/2008 er eftirfarandi færslu bætt við í vöruflokkinn „Aðrir brenndir drykkir“:

	„Tequila“	Mexíkóska ríkjasambandið
--	-----------	--------------------------

2. gr.

Reglugerð þessi öðlast gildi á tuttugasta degi eftir að hún birtist í *Stjórnartíðindum Evrópusambandsins*.

⁽⁷⁾ 6. forsenda í framkvæmdarreglugerð (ESB) nr. 716/2013.

Reglugerð þessi er bindandi í heild sinni og gildir í öllum aðildarríkjunum án frekari lögfestingar.

Gjört í Brussel 27. febrúar 2019.

Fyrir hönd framkvæmdastjórnarinnar,

Jean-Claude JUNCKER

forseti.
